

Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

Chief Minister Pu Lalduhoma'n FCRA Bill Joint Parliamentary Committee-a ngaihtuah tura dah a ni chu lawmawm atih thu a sawi.

Independence Day vawi 80-na lawm turin District hrang hrang a inpeih tawh a, tuang taka lawm anih theih nan venhimna pawh uluk taka ruahman a ni.

Health Minister Pi Lalrinpuii'n Civil Hospital, Aizawl thuam that mek ani tih sawiin damlote tan malsawmna a thlen ngei a beisei tih a sawi.

Indian Meteorological Department chuan state thenkhat chu ruahsur nasa tawng thei dinhmunah an ding tiin, fimkhur turin a chah.

<><><>

CM : FCRA

Chief Minister Pu Lalduhoma'n Foreign Contribution (Regulation) Amendment Bill, 2026 Joint Parliamentary Committee ngaihtuah tura dah a ni chu lawmawm atih thu a sawi.

Social Media kaltlangin Pu Lalduhoma chuan he thu hi a sawi a, Union Home Minister Amit Shah hmalakna hnuaiah Lok Sabha in Foreign Contribution (Regulation) Amendment Bill, 2026 Joint Parliamentary Committee ngaihtuah tura a dah chu lawmawm atih thu sawiin hei hian ngaihda zaawh leh mitin inlungualna a thlen ngei a beisei tih a sawi.

Joint Parliamentary Committee ngaihtuah tura Foreign Contribution (Regulation) Amendment Bill, 2026 dah rawtna Motion hi nilaini khan Union Minister of State for Home Affairs, Nityanand Rai-an House-ah a pu lut a, amaherawhchu Joint Parliamentary Committee ngaihtuah tura a ni ta a ni.

Ruahman dan chuan Foreign Contribution (Regulation) Amendment Bill, 2026 zirchiangtu tur Joint Parliamentary Committee-ah hian member 31 awm tura ruahman a ni a, Lok Sabha atangin member 21 leh Rajya Sabha atangin member 10 ruat tur a ni a. Joint Parliamentary Committee chu Parliament thlasik thutkhawm neih tur chawlhkar hmasa ber tawp hmain an zirchianna Report theh lut hman tura beisei a ni.

<><><>

RS MP

Rajya Sabha MP Pu K Laltluangkima'n nimin khan Union Home Minister Amit Shah hmu in Mizorama khuarel chhiatna thlang thei hrang hrang laka inven dan a sawipui.

Pu K. Laltluangkima chuan Union Home Minister hnenah hian Mizoram chu leimin avanga harsatna hrang hrang thleng thin ani tiin chinfel dan kawng zawnsak turin a ngen a, sum leh pai lama tanpuina bakah mithiam zirchiang tur tir lut a, harsatna thleng thei sutkian anih theih nan hmalak pui turin a ngen a, Union Home Minister hian state sawrkarin ruahmanna felfai tak siama thehlut turin alo hrilh a ni.

Pu K. Laltluangkima hian FCRA chungchang sawipuiin Union Home Minister in Joint Parliament Committee in ngaihtuahtur a thu a tihtluk chhan chu Chief Minister Pu Lalduhoma nawr na avang ani tiin a hrilh thu a sawi bawk.

<><><>

I-DAY PREPAREDNESS

Independence Day vawi 80-na lawm turin District hrang hranga inbuatsaihna peihfel ani tawh a, I-Day tluang taka lawm anih theih nan venhimna pawh uluk taka ruahman a ni.

Aizawl khawpui chhungah chuan venhimna a khauh thei ang bera kalpui niin police te pawh hmun hrang hrangah duty tir an ni a, khawlai fangin an endik vek a, a lawmna pui ber Aizawl Lammual pawh ngun takin ven a ni a, naktuka a lawmna turah hian Chief Minister Pu Lalduhoma'n thu a sawi dawn a ni.

Mizoram sawrkar chuan he hun pawimawh tak hmang tur leh a hmanna hmunah te, tel theuh turin khua leh tui zawng zawng te a sawm a. A bik takin Sawrkar hnathawkte chu Independence Day lawmna programme-ah tel ngei tura hriattir an ni.

India ram Independence Day lawmna pui ber Aizawl lammual ah hian parade hmuhdawm tak thlir tur a awm dawn a, Armed Contingent 7, Unarmed Contingent 7 leh school contingent 13 bakah band party 3 an tel dawn a, kumin hian state pawn atangin Manipur Police an parade dawn bawk a ni.

Akashvani Aizawl Regional News Unit chuan Independence Day pual hian Newsreel a buatsaih dawn a, inrinni tlai dar 4 ah District hrang hranga Independence Day hman dan chanchin ngaihthlak theih a ni ang.

<><><>

ASSEMBLY SESSION

Assembly Fur thutkhawm lo awm tur hun hman dan tur duangtu tur Business Advisory Committee (BAC) chu vawiin hian an thukhawm dawn.

Assembly Fur thutkhawm hi larsap Gen. Vijay Kumar Singh chuan tun thla (August) ni 25 a tan turin a ko a. Hei hi tuna Assembly ding lai, Assembly 9-na vawi 7 thutkhawmna tur a ni dawn a. August ni 25 chawhma dar 10.30 atangin tan a ni ang. Assembly inkhawm lo awm tur rei zawng leh hun hman dan tur duangtu tur BAC hi an chairman Assembly Speaker Pu Lalbiakzama hovin vawiinah an thukhawm dawn a. Sorkar atanga dan siam tur a luh tam leh tlem a zirin Assembly inkhawm hun hi ruahman thin a ni tlangpui a ni.

Assembly Secretariat atanga thu dawn danin tun thleng hian Irrigation & Water Resources department atanga dan siam tur (bill) lut bak bill dang a la lut lova. Starred Question 292 lut tawhin Unstarred question 61 a lut tawh a, Paper pharh tur pathum a lut tawh bawk.

<><><>

HEALTH MINISTER

Health Minister Pi Lalrinpuii'n Civil Hospital, Aizawl thuam that mek ani tih sawiin damlote tan malsawmna a thlen ngei a beisei tih a sawi.

Social Media kaltlanga he thu hi sawiin Pi Lalrinpuii chuan USG khawl chhuak thar ber - Samsung RS 85 chu Civil Hospital, Aizawl a hman turin a thleng tih sawiin cheng Nuai 100 chuang man ani a ti a, hmasawmna thar chuan damlote malsawmna thlen ngei se a duh tih a sawi.

Health Minister chuan khawl thar chu ultrasound khawl tha bik niin a hman tangkaina ber chu Radiology, General Imaging, leh taksa chhung hmuh chhuah harsa en nan a ni a ti a, khawl chuan thin (liver), kal, leh pumpui chhunga natna hrang hrang fatty liver thlengin fiah takin a thlalak a la thei a; hnute bawk (breast cancer) leh thyroid thil lo awm te a hmu chhuak thei tih sawiin thazam te tak te chhunga thi kal dan thlengin Chiang takin a en thei tih sawiin khawl chu bun nghal niin tangkai taka hman anih a beisei thu a sawi.

<><><>

KRISTIAN HLA BU

Mizoram Presbyterian Kohhran leh Baptist Church of Mizoram tangkawpten an buatsaih Kristian Hla Bu thar chu naktuk chawhnu dar 1 ah Mission Veng Kohhran biakinah tlangzarh a ni dawn.

Kristian Hlabu tlangzarh inkhawm hi Rev Dr K. Lallawmzuala'n kaihruaiin Synod Moderator Rev John Raldosanga'n Kristian Hla Bu chu Pathian hnenah hlanin a tlangzarh dawn a, Mizoram Synod Choir leh Aizawl Area Baptist Choir zaipawl ten hla an rem dawn a, Kristian hla bu thar hi programme hman zawh atangin lei theih a ni ang.

Thudawn danin tuna hman mek Kristian Hlabu ah hian hla 600 a awm mek a, heng zinga 20 hi paih niin hla thar 70 dah belh a ni a, Kristian Hlabu tharah hian hla 650 a awm tawh dawn a ni.

Kristian hla bu len zawng hi chi thuma siam a ni a, a man tlawm ber Rs 250 niin cheng 300 man leh cheng 350 man a awm bawk ang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

LAWNGTLAI ERO

Lawngtlai District Additional DC, Electoral Registration Officer (ERO) ni baw David Lalrinawma (MCS) chu electoral roll Special Intensive Revision (SIR) buaipui lai a zu rui a puh a nih avanga koh kir anih hnuah transfer a ni.

Pu David Lalrinawma transfer order hi August ni 11 khan tihchhuah niin ICT Department Deputy Secretary hna a chelh dawn a, Lawngtlai District Additional DC atan hian DP&AR Deputy Secretary nilai at Pu H. Lalrinpuia, MCS chu Special Intensive Revision tih chhung atan ruat lailaw a ni a, SIR zawh hunah DP&AR Deputy Secretary hna a chelh chhonzawm dawn a ni.

Lawngtlai ERO hi Borapansury polling station a claims and objections chungchang buaipui a nih lai-in zu a rui ni a puh a ni a. Borapansury leh a chhehvel khuate hi Bangladesh ramri depa awm a nih hlawm avangin electoral roll buatsaih kawngah fimkhur zual a ngai hle ni a hria-in tlawmngai pawlte pawhin uluk taka an vil mek lai a ni.

<><><>

DRUGS SEIZED

Excise & Narcotics Department leh Hnahtial leh New Ngharchhip YMA tangkawp chuan Nilaini khan heroin thahnem tak leh a neitu an man.

Excise & Narcotics Department leh Hnahtial leh New Ngharchhip Branch YMA hian Nilaini tlai dar 4 khan New Ngharchhip khaw dai, Tiau lui pengah Heroin gram 120 (Hawng 10) leh a neitua puh mi pahnih – M. C. Lalhuzauva (kum 36) Tapho khua leh Vanlalpeka (kum 33) Khawhri khuaa khawsa nia inchhalte an man. Heng Heroin te hi Myanmar atanga an lak luh niin, tihral an tum mek lai a ni. Heroin vanga mante hi thubuai siamsak niin nimin khan Court-ah hruai nghal an ni.

<><><>

IMD ISSUES WARNING

Indian Meteorological Department chuan state thenkhat chu ruahsur nasa tawng thei dinhmunah an ding tiin, fimkhur turin a chah.

IMD thuchhuakin a tarlan danin, ruahsur nasa hian a bik takin Chattisgarh leh a chhehvel a tuam rin a ni a, Himachal Pradesh, Jharkhand, Odisha leh Uttarakhand – ah pawh ni li chhung vel chu ruah a sur nasat rin a ni.

<><><>

I DAY FOOTBALL

India Independence Day 2026 puala inelna I Day Football Tournament chu a vawrtawp a thleng chho mek a, inrinni hian Final ah Kanan FC leh Aizawl FC an intum ang.

Mualpuia Rajiv Gandhi Stadium-ah nimir khan Semi Final khelhi niin Inkhel hmasa zawkah Kanan FC chuan MLS FC chu si 4, si 3 in an hneh a, Inkhel hnunung zawkah Aizawl FC chuan Chanmari FC chu si khata hnehin Final an lut ve bawka ni.

I Day Football Tournament Final hi inrinni zan dar 7 leh chanve ah Kanan FC leh Aizawl FC ten Mualpuia Rajiv Gandhi Stadium-ah an khel dawn a ni.

<><><>